

24/08/1998

Kerajaan luwes dalam tindakan

Radzi Wahab

KUALA LUMPUR, Ahad - Kerajaan akan bersikap lebih luwes dalam membuat penyesuaian terhadap perubahan persekitaran dan mengambil kira kesusahan rakyat miskin ketika melaksanakan strategi pemulihan ekonomi negara.

Perdana Menteri, Datuk Seri Dr Mahathir Mohamad berkata, tindakan itu sebahagian usaha proaktif dan pragmatik kerajaan dalam menjayakan langkah pemulihan yang sudah disusun dalam Pelan Pemulihan Ekonomi Negara.

Menurut Dr Mahathir, adalah penting langkah pemulihan yang segera dan berani diambil bagi memulihkan ekonomi negara yang menunjukkan tanda penguncupan.

"Walaupun pemulihan ekonomi akan terus dipengaruhi faktor dan perkembangan luar negara, masih terdapat banyak usaha yang boleh kita lakukan," katanya dalam kata aluan sempena penerbitan Pelan Pemulihan Ekonomi Negara yang dijual mulai esok.

Akhir bulan lalu, Menteri Tugas-Tugas Khas, Tun Daim Zainuddin, mengumumkan pelan itu yang dirumuskan Majlis Tindakan Ekonomi Negara (MTEN) dan diluluskan Kabinet, mengandungi enam matlamat utama dan agenda bertindak ke arah pemulihan ekonomi.

Matlamat itu termasuk menstabilkan nilai ringgit, mengembalikan keyakinan pasaran, mengekalkan kestabilan di pasaran kewangan, memperkukuh asas ekonomi, meneruskan agenda ekuiti dan sosioekonomi serta memulihkan sektor yang terjejas.

Dr Mahathir berkata, selain usaha kerajaan merangka dan melaksanakan beberapa tindak balas segera bagi menangani krisis, sektor swasta mesti menunjukkan keyakinan dan daya tahan.

"Sokongan awam juga perlu dan rakyat tidak seharusnya mudah terpengaruh dengan pandangan dan pendapat yang bertujuan menggugat keyakinan dan daya tahan mereka. Inilah masanya kita perlu berganding dan bekerjasama," katanya.

Beliau berkata, kini Malaysia menghadapi cabaran paling besar dengan ketahanan rakyat negara ini dicabar.

Sejak merdeka, katanya, negara mencatat kejayaan cemerlang dalam pembangunan dan kemajuan ekonomi yang pencapaiannya dilakukan dengan penuh susah payah.

"Bagaimanapun, usaha mantap dan kuat, fikiran yang jelas dan semangat berdaya tahan, berjaya membawa rakyat Malaysia dalam mengatasi ujian dan cabaran di masa lampau itu.

"Kini sekali lagi kita sebagai sebuah negara dicabar untuk membuktikan ketahanan kita," katanya.

Perdana Menteri berkata, sejak pertengahan kedua tahun lalu, ekonomi rantau ini termasuk Malaysia, menjadi kacau-bilau.

Penurunan menjunam nilai ringgit dan kejatuhan pasaran saham menjadikan Malaysia miskin dalam tempoh singkat, manakala pelaburan dan penggunaan swasta jatuh mendadak menyebabkan pengangguran meningkat.

Sehubungan itu, Dr Mahathir berkata, dalam proses mengatasi kerumitan ekonomi, rakyat tidak dapat mengelak daripada berkorban dan menanggung sedikit kesulitan.

"Terdapat halangan sebenar yang mesti diatasi sebelum kita dapat mencapai semula landasan pertumbuhan ekonomi yang berterusan dan kukuh seperti dahulu," katanya.

Bagaimanapun, katanya, dengan kestabilan politik, pendekatan dasar dan strategi yang pragmatik, keutuhan sosial dan sokongan rakyat, cabaran yang

sedang dihadapi itu dapat diatasi.  
(END)